

第二冊 第五課 我的身軀

〈下課的時陣〉

口白：下課矣，一聽著鐘仔聲，逐家攏真歡喜。

豆仔：總算下課矣，我看冊看甲額頸足痠的。

（豆仔越頭看著飯粒仔咧食物件，四秀仔囡甲規桌頂）

豆仔：飯粒仔，你的肚臍走出來矣，腹肚看現現矣啦！

飯粒仔：這領衫有較細領啦。

豆仔：我看你毋通閣食矣。

丸仔：阿兄。

豆仔：丸仔，你哪會來？

丸仔：我的額頸仔去予蠓仔叮著。

飯粒仔：彼隻蠓仔一定足枵的。

紅圓仔：丸仔。

豆仔：我的跤啦！

紅圓仔：失禮、失禮啦！

丸仔：紅圓仔，啥物代誌？

紅圓仔：無啥啦，我的腹肚足枵的。

丸仔：你一講，我的腹肚嘛枵起來矣。

飯粒仔：丸仔，你閣食，會變成一粒丸仔喔！

丸仔：龜笑鰲無尾，我的身材真好，你看我的腰。

豆仔：你有腰？

丸仔：阿兄，你共我會記得！

紅圓仔：恁兄妹仔足愛觸呢！

飯粒仔：紅圓仔，你的手流血呢！

紅圓仔：毋是啦，我去予紅筆畫著。

丸仔：害我驚一下！

豆仔：按呢足歹看的呢。

丸仔：我知啦。

豆仔：害啊，上課矣，這節課愛去運動埕呢！

看卡通學臺語 B2

飯粒仔：等我啦！

（飯粒仔走甲一半，褲底煞焮開）

紅圓仔：你的尻川。

飯粒仔：我愛減肥矣啦。

【講看覓】

第一、影片內底有講著啥物身軀的部位？

第二、是按怎丸仔會講飯粒仔「龜笑鰲無尾」？